

2 TESALONAIIKA

1 ¹Iga Pol na Sailas na Timoti na iga qalub anjam endi nenngrenyosim ningi tamo ungasari Tesalonaika qureq dia Yesus aqa ñam qa koroosib loueqnub qaji ningi qa qarinyonum. Ningi gago Abu Qotei wo Tamo Koba Yesus Kristus wo nangi aiyel taqnjrejunub.

²Gago Abu Qotei wo Tamo Koba Yesus Kristus wo nangi aiyel ningi qa are boleinjrimqa ningi lawo na soqniye.

Gulube oqa bati qa Tesalonaika nangi singila na tigeleqnub

³O was qu, iga gaigai ningi qa are qaloqnsim deqa Qotei binjyeqnum. Iga kere degyeqnum. Di kiyaaqa? Nungo areqalo Yesus qa singilateqnub qaji di tulan kobaqujaeqnu. Ningi segi segi na nungo Kristen was qu nangi qalaqalainjreqnub. Nungo kumbra di dego tulan kobaqujaeqnu.

⁴Utru deqa iga qure kalilq di laqnsimqa tamo ungasari Qotei louqa koroeqnub qaji nangi ningi qa sainjroqnsim nungo ñam soqteqnum. Kumbra uge kalil jeu tamo nangi na ningi engeqnub qaji deqa ti gulube kalil ningi qa branteqnu qaji deqa ti iga na nangi sainjroqnsim endegsi minjreqnum, “Tesalonaika Kristen nangi Yesus qa nango areqalo tulan singilatoqnsib deqa nangi gulube ti jaqatin ti kalil di qoboioqnsib singila na tigelejunub.”

Qotei a kumbra tintin na gago une qa iga pegigeqnu

⁵Gulube kalil di nungoq di branteqnu deqa iga endegsi poigwo, Qotei a kumbra tintin na gago une qa iga pegigeqnu. Ningi jaqatin eqnub di aqa utru agiende. Qotei a nungo Mandor Koba sosim ningi taqatngwajqa deqa. Osim a na ningi tulan keretngwas. Yim deqa ningi aqa tamo boledamu soqnib a nungo Mandor Koba sosim ningi taqatngwas.

⁶Mondon Qotei a kumbra tintin endeqaji yqas. Tamo nangi ningi gulube engeqnub qaji nangi di Qotei na kamba gulube enjrqas. ⁷Tamo Koba Yesus aqa lan angro nangi ti ñamyuo ti lan qureq dena mandamq aisib tamo ungasari nango ñamgalaq di brantoqnib bati deqa Qotei na ningi ti iga ti aqaryaigosim gago gulube kalil iga bini qoboieqnum qaji di yaigosim kobotim iga aqaratqom. ⁸Ariya Yesus a mandamq aisim tamo

nangi Qotei qaliesai qaji nangi ti tamo nangi gago Tamo Koba Yesus aqa anjam bole dauryqa urateqnuq qaji nangi ti n̄olawotnjrqas. ⁹Osim nangi awai ugedamu enjrqas. Nango awai uge agiende. Nangi Tamo Koba Yesus a ombla sqasai. Nangi aqa singila koba ti rian̄ ti unqasai dego. Nangi tulan̄ isaq di sosibqa bati gaigai padalosi sqab. ¹⁰Bati Qotei na nami giltej qaji di brantimqa Tamo Koba Yesus a bosim nangi degsim n̄olawotnjrqas. Ariya Qotei aqa segi tamo un̄gasari a qa nango areqalo singilateqnuq qaji nangi kalil a mandamq aioqnm aqa singila unsibqa aqa n̄am soqtosib a qa tulan̄ areboleboleinjrim sqab. Nangi dego nangi ti areboleboleingim sqab. Di kiyaya? Qotei aqa anjam iga nami ningi mern̄goqnem qaji di ningi qusib nun̄go areqaloq di singilatejunub deqa.

Pol a Qotei na Tesalonaika nangi aqaryainjrqajqa deqa pailyeqnu

¹¹Deqa was qu, iga bati gaigai ningi qa osim gago Qotei endegsi pailyeqnum, “O Abu, ni na Tesalonaika Kristen nangi aqaryainjroqnmqa kumbra kalil ni nami nangi dauryqa metnjrem qaji di nangi dauryoqnbqa ni unsim minjrqam, ‘Ningi keretonub.’ O Abu, ni na nangi singilatnjrimqa kumbra bole kalil nangi yqajqa arearetnjreanu qaji di nangi yoqnaqab. Osib Yesus qa nango areqalo singilatoqnsib aqa wau geregere ojqa.” O was qu, iga degsim ningi qa Qotei pailyeqnum. ¹²Deqa nun̄go kumbra dena ningi gago Tamo Koba Yesus aqa n̄am soqtoqniye. Yimqa a na kamba dego nun̄go n̄am soqtetn̄goqn̄as. Gago Qotei wo Tamo Koba Yesus Kristus wo nangi aiyel ningi qa are tulan̄ boleinjroqnmqa kumbra di nun̄goq di brantoqneme.

Yesus aqa bqajqa bati brantosaisoqnm Qotei aqa dal anjam gotran̄yo qaji tamo a brantqas

2 ¹O was qu, mondon̄ gago Tamo Koba Yesus Kristus a lan̄ qureq dena boqnmqa ningi ti iga ti aqa singaq di koroqom. Iga deqa ningi anjam kiñala mern̄gim quie. ²Tamo qudei nangi gisañoqnsib endegsib mern̄geqnuq, “Tamo Koba Yesus a olo bqajqa bati brantqo.” Osib tamo qudei nangi endegsib mareqnuq, “Qotei aqa Mondor na degsi babtosiq iga mergwo.” Olo tamo qudei nangi mareqnuq, “Gago anjam di Qotei aqa anjam.” Olo tamo qudei nangi mareqnuq, “Pol aqa wau qujai nangi ti anjam di nengren̄yonab iga sisiyem.” O was qu, nango anjam di gisañ. Deqa ningi nango anjam di qusibqa ningi urur prugugetosib are gulubeingaiq. ³Tamo qudei nangi gisañ anjam deqaji ningi mern̄gibqa ningi qusib dauryaib. Nangi gisañ kumbra dego ningi osorn̄gibqa ningi bole edegaib. Nangi quie. Yesus a olo bqajqa bati lan̄a brantqasai. Bati di brantqa laqnmqa kumbra qudei namoqna endegsi bqas. Tamo gargekoba nangi boqnsib nangi tulan̄ diqoqnsib Qotei qoreiyoqnsib sqab. Satan a na aqa tamo kobaquja dego qarinyim bqas. Tamo di a Qotei aqa dal anjam

gotranjo qaji tamo. A njamyoq di padalougetqas. ⁴Satan aqa tamo di a na qotei gisan kalil nangi jeutnjroqnas. Osim a diqoqnsim aqa segi nam soqtoqnsim qotei gisan nangi di tulan bunjnrqas. Deqa a Qotei aqa atra tal koba miligiq gilsim di awoosim marqas, “E segi Qotei.”

⁵Bati e nungo ambleq di sosimqa e tamo uge deqa ningi merngoqnem. Ningi ijo anjam di olo are walngwo kio? ⁶Satan aqa tamo di a bosaiunu. A bqajqa bati agi Qotei a nami atej unu. A namoqna baim deqa a bqajqa gam tamo bei na getentejunu. Tamo yai na gam getentetejunu di ningi qalie. Ariya aqa bqajqa batiamqa Qotei na marim a brantqas. ⁷Ningi qalie, bini Qotei aqa dal anjam gotranjo qaji tamo di a ulioqnsiq waueqnu. Ariya a wauoqnmqa gam getentejunu qaji tamo di Qotei na taqal waiyim Satan aqa tamo kobaquja di a boleq dqas. ⁸A boleq dimqa Tamo Koba Yesus a rian koba ti bosim aqa me mondor medabug na puyimqa jagwa koba dosim dal anjam gotranjo qaji tamo di qalsim moiqtas. O was qu, Yesus aqa rian dena tamo di tulan padaltougetqas. ⁹Dal anjam gotranjo qaji tamo di a Satan aqa singila ti bosim aqa gisan kumbra na manwa gargekoba tamo ungasari nangi osornjroqnas. ¹⁰Osim gisan kumbra dena a na tamo ungasari padalqa gam dauryeqnub qaji nangi gisa gisanjroqnas. Yim nangi padalqab. Di kiyaga? Qotei na nangi elenqa osiq aqa anjam bole nangi minjreqnaqa nangi deqa arearetnjrosaeqnu. ¹¹Deqa Qotei na nango areqalo niñaqyetnjrimqa nangi aqa anjam bole dauryqa uratosib Satan aqa gisan anjam dauryoqnqab. ¹²Deqa iga qalieonum, tamo kalil Qotei aqa anjam bole nango areqaloq di singilatosaioqnsib kumbra uge uge yqajqa arearetnjreqnu qaji nangi di Qotei na nolanotnjrsim awai uge enjrqas.

Namoqna Qotei na ningi oqajqa deqa marsiq ningi giltngej

¹³Ariya was qu, Tamo Koba Yesus a na ningi tulan qalaqalaingeqnu. Deqa bati gaigai iga ningi qa are qaloqnsim Qotei binieqnum. Namona Qotei na ningi oqajqa deqa marsiq ningi giltngej. Aqa Mondor Bole na ningi singilatngimqa ningi aqa segi tamo ungasari boledamu sosib aqa anjam bole nungo areqaloq di singilatib kumbra dena Qotei na ningi oqajqa deqa marsiq ningi giltngej. ¹⁴Qotei aqa areqalo agiende. Ningi gago Tamo Koba Yesus Kristus aqa rian koba ti aqa singila ti unqajqa. Deqa a na aqa anjam bole iga nami ningi merngoqnem qaji dena ningi metngej. ¹⁵Deqa was qu, ningi singila na tigeloqnsib Qotei aqa anjam kalil iga nami ningi merngoqnem qaji di dauryosib soqniye. Anjam kalil iga nenngrenyosim ningi qa qarinyoqnem qaji di dego ningi dauryoqniye.

¹⁶Gago Tamo Koba Yesus Kristus wo gago Abu Qotei wo nangi aiyel na iga tulan qalaqalaingeqnu. Qotei a iga qa are boleiyoqnsiq deqa a gaigai gago are boletetgeqnu. Osiqa a na iga singilatgeqnu. Deqa mondon a na iga boletgwajqa deqa iga tarijoqnsim unum. ¹⁷Qotei a na nungo are

singilatetngqonsim aqaryaingqonimqa ningi kumbra bole kalil geregere dauryoqnsib wau bole bole yoqniye.

Pol a Tesalonaika nangi minjrej, “Ningi iga qa Qotei pailyoqniye.”

3 ¹Ariya was qu, gago anjam qujai bei unu. Anjam agiende. Ningi iga qa Qotei pailyoqniye. Yimqa Qotei na iga aqaryaigimqa iga Tamo Koba Yesus aqa anjam geregere mare mare laqnqom. Yimqa aqa anjam di tulan kobaosim sawa sawa kalil keretoqnmqa tamo tulan gargekoba nangi quoqnsib Yesus aqa ñam soqtoqnqab. Nami Yesus aqa anjam nungo ambleq di tulan kobaej dego kere. ²Deqa ningi iga qa Qotei pailyoqnbqa a na iga aqaryaigosim tamo uge nanjo banq dena iga elenqas. Tamo nangi di kumbra uge uge yeqnub. Ningi qalie, tamo gargekoba nangi Kristus qa nanjo areqalo singilatosaeqnb.

³Ariya ningi qalie, Tamo Koba Yesus a kumbra bole segi yeqnu. Deqa iga a qa gago areqalo singilatesqom. A na ningi singilatngqonsim taqatngqonimqa Satan a na ningi ugeugeingwa keresai. ⁴Iga qalie, anjam kalil iga nami ningi merngoqnem qaji di ningi dauryoqnsib unub. Agi bunuqna dego ningi dauryoqnsib sqab. Tamo Koba Yesus na iga degsi mergonaq iga qalieem.

⁵Gago areqalo agiende. Tamo Koba Qotei a na nungo areqalo gereiyetngimqa ningi aqa qalaqalaiyo kumbra geregere qalieosib dauryoqniye. Osib Kristus a nami singila na tigelosiq gulube qoboioqnej dego kere ningi dego singila na tigeloqnsib gulube qoboioqniye.

Ningi kalil wauoqniye

⁶Ariya was qu, gago Tamo Koba Yesus Kristus aqa ñam na iga anjam bei ningi endegsi merngwom. Was qudei nangi gago anjam iga nami ningi merngoqnem qaji di dauryqa uratosib wauqajqa asginjreqnu. Deqa ningi na was nangi di qoreinjrsib isaq giliye. Ningi nangi koba na saib. ⁷Ningi gago kumbra segi dauryoqnsib soqniye. Ningi gago kumbra qalie. Gago kumbra agiende. Iga nami ningi koba na sosimqa iga wauqajqa asgigosaioqnej. ⁸Iga nungo ingi ingi laja yaingosaioqnem. Iga gago segi ingi awaiyoqnsim uyoqnem. Iga ningi gulube engwa uratosim deqa iga qanam ti qolo ti waukobaoqnem. ⁹Bole, iga ñam ti deqa iga nungo ingi ingi laja yaingwa kere. Di iga uratem. Di kiyaga? Iga endegsi are qalem. Iga wauoqnsim gago segi ingi ingi awaiyoqnsim uyoqnmqa gago kumbra di ningi unsib bole qa marsib dauryoqnqab.

¹⁰Ningi qalie, iga ningi koba na sosimqa endegsi merngoqnem, “Tamo a wauqasai di a ingi uyqasai dego.” ¹¹Ariya iga anjam endegsi quem. Nungo ambleq di tamo qudei nangi wauqajqa asginjreqnu. Nangi laja sosibqa yomu anjam koba laja laja mareqnub. ¹²Deqa iga Tamo Koba Yesus Kristus aqa ñam na tamo nangi deqaji endegsi minjrqom, “Ningi lawo na sosib wauoqnsib nungo segi ingi ingi awaiyosib uyoqniye.”

¹³O was qu, ningi kumbra bole yoqnqajqa asgingaiq. ¹⁴Was bei a gago anjam iga nengrenyonum qaji endi uratimqa ningi na a taqal waiyib isaq gilem. Yimqa aqa kumbra uge deqa a jemaityqas. ¹⁵Ariya a nungo jeu tamo edegaib. Ningi endegsib maroqniye, “Tamo di a gago was. Deqa iga na Qotei aqa anjam minjimqa a are bulyqas.” Ningi degsib maroqniye.

Pol a kaiye anjam nengrenyosiq Tesalonaika nanqi qa qarinyej

¹⁶Tamo Koba Yesus a lawo kumbra qa utru. Deqa a na nungo are latetngimqa ningi gaigai are lawo na soqniye. Tamo Koba Yesus a ningi kalil koba na soqnebe.

¹⁷E Pol. E ijo segi ban na kaiye anjam endi nengrenyosim ningi qa qarinyonum. E ijo anjam kobotoqnsim qarinyqa laqnsimqa e degyeqnum. Di ijo kumbra.

¹⁸Gago Tamo Koba Yesus Kristus a ningi kalil qa are boleyeme.